

Powšitkowne WOZJEWJENJA

njedźelu, 15. awgusta 2021

Wusyłaŋje Božeje mšě

Serbskorěčnu Božu mšu móža wěriwi tutu njedźelu, 15. awgusta, znowa jako live-stream w interneće scěhować. Wona přenjesje so w 9 hodž. z Chróšćanskeje cyrkweje. Link na nju je pod www.posol.de a na wosadneje stronje podaty.

Potrjechenym powodženja w zapadže pomhać

Za wopory powodženja w zapadneje Němskej hromadzi Towarstwo Cyrila a Metoda z.t. (TCM) ze swojej akciju „Łužica pomha“. Wone je zwisk k wosadze we Weilerswisće juhozapadneje Kölna nawjazało. Tam bydlaca młoda serbska swójba je jón sposrědkowała. Nadrobnje je tole w Katolskim Posole z 25. julija wopisane. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Weilerswis“ přepokazać. Štóź swoju dospołnu adresu poda, na přikład z mailku na TCM@Posol.de, tomu wustaji TCM darowanisku kwitowanku. Ta so z přepokazanjom awtomatisce sobu njeposrědkuje.

Zetkanje putnikow do Krupki

Wšitcy, kotřiž su so za pěše putnikowanje do Krupki wot njedźele do pjatka, 22. do 27. awgusta, přizjewili, su na přihtowansku zhromadźiznu přeprašeni. Ta zahaji so tutu njedźelu, 15. awgusta, z nyšporom w 14.00 hodž. w Chróšćanskej cyrkwi. Sobu putnikować smědža jeničce ći, kotřiž so na přihtowanskej zhromadźiznje wobdźěla. Na nju su tež ći přeprašeni, kotřiž na čakanskej lisćinje steja.

Wulět młodostnych do Sakskeje Šwicy

Dekanatne dušepastyrstwo młodžiny přeprašuje młodostnych ze wšěch serbskich wosadow wot přichodneho 9. lětnika na zhromadny wulět do Sakskeje Šwicy, a to njedźelu, 19. septembra. Wotjězd budže něhdže w 12 hodž., nawrót je w 20 hodž. planowany. Přinošk we wysokosci 20 eurow woprija jězbu z busom, jědź a jězbu z čołmom. Přizjewjenja přijimaja so hač do pónđzele, 30. awgusta, online. Wotpowědny link k tomu je pod www.posol.de podaty. Dokładny plan wotjězda busa so po 30. awgusće přizjewjenym wosobinsce zdžěli.

Z busom do Krupki kemši

Na putniku Božu mšu srjedu, 25. awgusta, w 10 hodž. w Krupce pojedže zaso bus. Štóź chcył sobu jěć, měł so w Šmitec wozydłownistwje w Radworju přizjewić, telefonowe čisło (03 59 35) 28 60.

Film k jubilejej biskopstwa w gestikulaciskej rěči

Pod hesłom „100 dobrych přičinow“ swjećeše Drježdžansko-Mišnjanske biskopstwo w juniju swoje znowazałoženje před 100 lětami. Film, kotryž na tute stolětne stawizny zhladuje, ale tež na založenje biskopstwa w lěće 968, předleži nětko tohorunja w gestikulaciskej rěči. W nim, kotryž traje nimale 15 mjeńšin, předstajeja zdobom žiwjenje katolskich Serbow. Link na film je pod www.posol.de wozjewjeny.

Z kolesom putnikować

Na tyždenske putnikowanje z kolesom přeprošuje Smochčanske kubłanišćo swjateho Bena składnostnje 100. róčnicy znowazaloženja Drježdžansko-Mišnjanskeho biskopstwa. Wone wotměje so wot njedźele do njedźele, 5. do 12. septembra. W dnjowych etapach, kotrež budu stajnje 40 do 60 kilometrow dołhe, wopytaja wobdźělnicy wuznamne cyrkwinsko-historiske městnosće w Hornjej Łužicy, mjez druhim swjatnicu w Róžeńce a Mišnjanske winicy. Po puću su planowane rozmołwy, rozpominanja, čitanja a modlenje. Nawod změjetej Christine Weber a Hubertus Klaus, duchownje přewodźeć budže putnikow farar Franz Scharfenberg. Přizjewjenja přijimuju telefonisce pod čisłom (03 59 35) 2 21 72 abo z mejlku na Umwelt@kebs.de. Link je pod www.posol.de wozjewjeny.

Wustajeńca wo smjertnych rubach Chrystusowych

Kulowska wosada přeprošuje na wustajeńcu wo smjertnych rubach Chrystusowych. Ta je hač do pónđzele, 30. awgusta, w Kulowskej Křižnej cyrkwi na Budyskej 32 přistupna. Wtewrjena je wona stajnje njedźelu wot 11.00 do 12.00 hodź a popołdnu wot 15.00 do 18.00 hodź. Chce-li sej ju něchtó w běhu tyždjenja wobhladać, měł so wón w Kulowje na farje přizjewić, telefonowe čisło (03 57 25) 75 80. Wustajeńcu je towarstwo PENUEL zestajało. Wone rozumi so jako kruh přećelow wěrneho wobliča Jězu Chrysta. Wone přeslědžuje historiske smjertne ruby a prócuje so wo to, je zjawnosći spřistupnić. Čłonojo tohohle towarstwa z wjacorych europskich krajow zetkaja so wot pjatka do njedźele, 13. do 15. awgusta, w Kulowje k swojemu lětnemu schadźowanju. Kolpingowa swójbja a druge skupiny wustajeńcu přewodźeja a podpěruja.

Ponowjeny Winfriedowy dom sej wobhladać

Po wjace hač dwulětnym ponowjenju Winfriedoweho domu w Smiedebergu změja tam njedźelu, 5. septembra, wot 11 do 17 hodź. džen wotewrjenych duri. Zajimcy su přeprošeni, sej přetwarjeny džěcacy a młodžinski kubłanski dom Drježdžansko-Mišnjanskeho biskopstwa wobhladać. Hosćo budu potom nimo kapałki štyri skupinske rumnosće, žurlu, łubju k meditěrowanju, kreatiwnu džěłarnju, rumnosć za swobodny čas a hóstnu kuchnju wužiwać móc. W 20 hóstnych stwach změja městno za 70 łožow.

Mužojo a žony w bibliji

Seminar wo zhladowanju na muži a žony w Swjatym pismje wotměje so wot pjatka do njedźele, 10. do 12. septembra, w Smochčanskim kubłanišću swjateho Bena. Nawoda budže tamniši referent Ansgar Hoffmann, kotryž je zdobom nawoda Katolskeho bibliškeho skutka w Drježdžansko-Mišnjanskim biskopstwje. W seminarje chcedža so z tym zaběrać, kotry wobraz wo mužach a žonach biblija woprawdže skići. Předznajomosće njejsu trěbne. Zajimcy měli so pak pod telefonowym čisłom (03 59 35) 2 23 17 abo z mailku pod adresu ansgar.hoffmann@bg-schmochtitz.de přizjewić.

Z kreatiwnosću a spiritualitu sebje spóznać

Pod hesłom „Truny žiwjenja“ přeprošuje Smochčanske kubłanišćo swjateho Bena na seminar, při kotrymž móžeš „nutřkowe swěty“ spóznać, kotrež ze swójskej kreatiwnosću, molowanjom wobrazow a symbolow zwurazniš. Zaměr je, zo móža ći, kotřiž so na seminarje wot pjatka do njedźele, 17. do 19. septembra, wobdźěla, swójske resursy wotkryć a zmysł swójskeho puća nadeńć. Dny nawjedujetej eksercicijowy přewodźer farar dr. Hans-Konrad Harmansa a duchowna přewodźerka Maren-Magdalena Sorger. Zajimcy měli so pod telefonowym čisłom (03 59 35) 2 23 17 abo z mailku pod adresu ansgar.hoffmann@bg-schmochtitz.de přizjewić.